

Biden i Solana poručili

Lideri moraju prevazići podjele

U zajedničkoj izjavi izražena podrška Bosni i Hercegovini, jedinstvenoj državi sa dva entiteta, Dejtonskom sporazumu, te težnji stanovnika BiH ka pridruženju EU i NATO-u

Ove godine BiH može napraviti važan korak ka članstvu u NATO i EU ispunjavanjem pet ciljeva i dva uvjeta koje je postavilo Vijeće za implementaciju mira u vezi sa zatvaranjem OHR-a i njegovom tranzicijom u Ured specijalnog predstavnika EU, istaknuli su jučer u zajedničkoj izjavi potpredsjednik SAD-a Joseph Biden i visoki predstavnik za zajedničku vanjsku i sigurnosnu politiku EU Javier Solana, prenijela je Fena.

Očekujemo da se određeni napredak u tom pravcu postigne do juna, a proces završi u oktobru - naveli su Biden i Solana.



FINANSIJSKA ODGOVORNOST

Izražena je zabrinutost zbog ekonomske situacije, zbog čega je potrebna veća fiskalna kontrola

ta, Dejtonskom sporazumu, te težnji stanovnika BiH ka pridruženju evropskim i transatlantskim institucijama.

Također podržavaju reforme koje će biti potrebne za ostvarenje ove evropske budućnosti. Iskazuju i svoju podršku liderima koji imaju hrabrosti da, kako bi došli do kompromisa, prevaziđu etničke podjele, grade povjerenje, učvršćuju stabilnost i donose prosperitet BiH.

Izražavaju zabrinutost zbog izjava i aktivnosti u posljednjih nekoliko godina koje predstavljaju prijetnju teritorijalnom integritetu BiH, ovlastima države i pravima entiteta.

Biden i Solana su također zabrinuti zbog ekonomske situacije i primjećuju potrebu za većom fiskalnom kontrolom, finansijskom odgovornošću i transparentnošću. Zabrinuti su i za neovisnost pravosudnih institucija i vladavinu zakona.

Biden i Solana ističu, kako je

saopćeno iz Ambasade SAD-a u BiH, da će napredovanje na putu ka članstvu u EU i NATO-savezu donijeti istinske prednosti građanima BiH.

Bezvizni režim

One bi, na kraju, mogle biti bezvizni režim, više aktivnosti u oblasti trgovine i investicija, podrška ekonomskom razvoju i prosperitetnoj, stabilnoj budućnosti BiH u integriranom regionu zapadnog Balkana.

- Za to će biti potrebno zajedničko djelovanje i kompromis kako bi se ostvarile potrebne reforme, uključujući i funkcionalan ustav BiH, naveli su u zajedničkoj izjavi Biden i Solana.

Ističu kako će SAD i EU dati podršku ovom procesu razvoja i reformi, te izražavaju nadu da će sljedeći put posjetiti BiH koja planski napreduje na svom putu ka EU i NATO-savezu.

Institut za mir SAD-a o BiH Zajednička strategija Washingtona i Bruxellesa

Potrebna reforma izbornog zakona i obrazovnog sistema • Sud BiH ne smije ostati bez međunarodnih sudija i tužitelja

Jučer, dok je američki potpredsjednik Joseph Biden napuštao Sarajevo, javnosti je postao dostupan prvi sažetak sastanka koji je 3. aprila održan pod pokroviteljstvom i u vašingtonskim prostorijama Američkog instituta za mir (United States Institute for Peace). Iza zatvorenih vrata najviši evropski i američki dužnosnici raspravljali su o Bosni i Hercegovini i zadacima koji se nalaze prevashodno pred međunarodnom zajednicom u cilju stvaranja BiH održivom i funkcionalnom demokratskom državom.



Želje domaćih lidera

Nakon što su predstavnici Washingtona i Bruxellesa iznijeli svoje viđenje postdejtonskog razvoja BiH, kao i specifičnosti vremena (ratovi u Afganistanu, Iraku, napetosti u Iranu i Sjevernoj Koreji) u odnosu na doba nastajanja okvirnog mirovnog sporazuma u Daytonu, uslijedila je debata sa nekoliko glavnih akcenata buduće zajedničke transatlantske politike spram BiH (stoga nije nimalo slučajno da je Javier Solana uskladio vrijeme svojega boravka u Sarajevu sa Bidenovom vizitom).

Ono što ohrabruje jeste da su se učesnici respektabilnog skupa (vidi okvir) složili kako bez pet ciljeva i dva uslova ne može biti govora o povlačenju OHR-a, kao i da ne treba stvarati lažnu sliku lažnog progresa, što je, sjetit ćemo se, proteklih godina bilo dio strategije odnosa spram BiH.

"Partnerstvo SAD-a i EU je potrebno prije, tokom i poslije tranzicije", kaže se u izvještaju, uz dodatak kako dužnosnici EU vide da se dovoljna funkcionalnost države može postići kroz pretpristupni proces. No, i Evropljani i Amerikanci su skeptični žele li domaći politički lideri zaista - (pro)evropske reforme.

Mnogi učesnici smatraju da su preporuke Venecijanske komisije Vijeća Evrope iz 2005. dobra početna tačka. Također, utvrđeno je kako je potrebna reforma izbornog zakona i obrazovnog sistema koji produbljuju nacionalizam.

Funkcionalnost države, zajednički strateški cilj (po)novouspostavljenog prekoatlantskog savezništva, termin je širi od prilično izrabljenog termina ustavnih reformi: "Iako će se većina zahtjeva za funkcionalnijom državom riješiti reformom ustavnog poretka, to ne znači da na tome treba stati, a pogotovo ostaviti domaće političke snage bez kontrole cjelokupnog procesa", stoji, između ostalog, u izvještaju USIP-a, koji je definirao dva elementa zajedničke strategije: EU mora razjasni-

Ashdown, Gregorian, Serwer...

Moderatori sastanka u Američkom institutu za mir bili su Sir Paddy Ashdown, Daniel Serwer, vicepredsjednik USIP-ovog Centra za postkonfliktne mirovne i sigurnosne operacije, Tomaš Szunyog, direktor Jugoistočnog i istočnog Evropskog odjeljenja u Ministarstvu vanjskih poslova Češke.

Diskusiji su prisustvovali profesionalci iz State Departmenta, Vijeća za nacionalnu sigurnost u Ministarstvu domovinske sigurnosti, četiri bivša američka ambasadora u BiH, nekoliko bivših prvih zamjenika visokih predstavnika, sadašnji Raffi Gregorian, nekoliko bivših šefova misija OSCE-a u BiH, predstavnici nevladinog i akademskog sektora, predstavnici Evropske unije. Izvještaj su sastavili James Lyon i Kurt Bassuener.

ti šta je neophodno za funkcionalniju državu i pojačan američki angažman je neophodan. Učesnici su se složili kako treba početi Sporazumom iz Washingtona i Aneksom IV Daytonu te utvrditi koji elementi ovih dokumenata BiH čine nefunkcionalnom.

Šta očekuju građani

Vladavina prava, korupcija i organizirani kriminal imenovani su kao problemi koje mora EU da rješava u BiH: "EUSR mora sadržavati OHR-ov antikorupcijski tim, a u Sudu BiH ostaju međunarodni sudije i tužitelji", stoji u izvještaju.

Također, zaključili su u naša pitanja najupućenije glave Bruxellesa i Washingtona, građanima BiH je neophodno obrazložiti šta je potrebno uraditi da bismo jednog dana ipak, i pored svega, bili dio evropske porodice.

Faruk BORIĆ

V I J E S T I

Predsjedništvo BiH



Cikotić ide u Afganistan

Predsjedništvo BiH zadužilo je juče Vijeće ministara BiH da dostavi ovoj instituciji ocjenu opravdanosti sudjelovanja jedinica OSBiH u misiji u Afganistanu. Ministar odbrane Selmo Cikotić dobio je zadaću da lično ode i izvidi stanje u Afganistanu i način na koji će se angažirati jedinice OSBiH.

Donesena je i odluka da bh. delegaciju na konferenciji o svjetskoj ekonomskoj krizi i njenom utjecaju na razvoj, koja će biti održana u New Yorku od 1. do 3. juna, predvodi predsjedavajući Vijeća ministara Nikola Špirić.

Donesena odluka



Avdić ambasador u Beogradu

Predsjedništvo Bosne i Hercegovine na jučerašnjoj je sjednici imenovalo Seada Avdića za ambasadora naše zemlje u Srbiji, saznaje Oslobođenje.

Tako je nakon skoro dvije i po godine, Bosna i Hercegovina konačno dobila diplomatskog predstavnika u Beogradu.

Podsjećamo, zvanični Beograd najprije je odbijao prihvatiti agremen za Borišu Arnautu kao ambasadora naše zemlje, a potom je Haris Silajdžić zbog toga i zbog slučaja Jurišić odbio imenovati novog diplomatskog predstavnika. Jučer je i ovo riješeno.

J. F.